

Na osnovu člana 223. Zakona o Zdravstvenoj zaštiti (Sl.novine FBiH br.46/10), Skupština Ljekarske komore Tuzlanskog kantona na svojoj redovnoj sjednici održanoj dana 31.05.2011.godine usvojila je

## STATUT LJEKARSKE KOMORE TUZLANSKOG KANTONA

### Član 1.

Ljekarska komora Tuzlanskog kantona (u daljem tekstu: Komora) je samostalna strukovna organizacija doktora medicine i stomatologije (u daljem tekstu: ljekara), koji obavljaju svoje zanimanje na području Tuzlanskog kantona i Brčko distrikta BiH.

### Član 2.

Komora je pravna osoba sa sjedištem u Tuzli, Turalibegova 20.

Komora ima dva pečata okruglog oblika, prečnika 50 i 25mm, sa kružno ispisanim tekstom: Ljekarska komora Tuzlanskog kantona, Tuzla, i znakom Komore u sredini.

Komora ima i štambilj pravougaonog oblika, dimenzija 40x20mm sa oznakom za broj i datum.

Komora ima svoj znak koji se sastoji od dva koncentrična kruga u kome je ispisan tekst: LJEKARSKA KOMORA TUZLANSKOG KANTONA. U sredini znaka je stilizovani prikaz štita sa tri simbola ljljana na vrhu. U sredini štita je grafički prikaz otvorenih gradskih vrata u zidinama sa simbolom Eskulapa - *štap* oko kojeg se uvija *zmija*.

Glasilu Komore je revija MEDICUS koje ima grafički znak tekst Medicus, tako da su sva slova blijedo žuta, a slovo S zeleno sa linijom koja podvlači cijelu riječ. Tačka na slovu "i" je znak Komore.

Način upotrebe žiga odlučuje Izvršni odbor Komore s posebnim pravilnikom.

### Član 3.

Članstvo u Komori je čast i obaveza za sve koji kao ljekari rade direktno sa bolesnicima na teritoriju Tuzlanskog kantona i Brčko distrikta BiH.

Ljekari, koji žive na području Tuzlanskog kantona, ali i drugih kantona, a ne rade sa bolesnicima, mogu biti članovi Komore, ako tako žele, i ako preuzimaju prava i obaveze članova po Statutu.

### Član 4.

Komora štiti i zastupa interese zdravstva, brine o pravilnom ponašanju i ugledu ljekara i ljekarske struke, s tim da ispunjava sljedeće zadatke:

- vodi registar svojih članova,
- donosi kodeks medicinske etike i deontologije, prati i nadzire njegovo provođenje, te poduzima odgovarajuće mjere u slučaju njihovog kršenja,
- daje mišljenje Federalnom ministru, odnosno kantonalnom ministru o opravdanosti izdavanja, produženja ili oduzimanja odobrenja za obavljanje poslova privatne prakse, te početka, proširenja, promjene i prestanka rada zdravstvenih ustanova sa pozicije i očuvanja profesije koju zastupa,
- certifikuje članove komore za upravljanje novim zdravstvenim tehnologijama na osnovu načina i uvjeta za upravljanje novim zdravstvenim tehnologijama koje utvrđuje Federalna komora,

- utvrđuje maksimalnu cijenu zdravstvenih usluga za privatnu praksu koja ne ostvaruje prihode putem Zavoda zdravstvenog osiguranja kantona i ovjerava cjenovnik zdravstvenih usluga privatne prakse,
- daje mišljenje na cijene zdravstvenih usluga iz dobrovoljnog zdravstvenog osiguranja,
- zastupa interese svojih članova kod sklapanja ugovora sa Zavodom zdravstvenog osiguranja Federacije, odnosno kantona i drugim osiguravajućim zavodima,
- osigurava zaštitu građanima u ostvarivanju prava, s obzirom na kvalitet, sadržaj i vrstu zdravstvene usluge koja im se pruža,
- po službenoj dužnosti izdaje, obnavlja i oduzima licence svojim članovima na osnovu zajedničkih kriterija nadležne federalne komore,
- učestvuje pri utvrđivanju standarda i normativa zdravstvenih usluga,
- daje stručna mišljenja kod pripreme propisa koji su od uticaja na razvoj zdravstvene struke, organizira dodatno usavršavanje za proširenje djelatnosti unutar struke, s obzirom na nove dijagnostičko-terapijske metode,
- propisuje način oglašavanja i način isticanja naziva privatne prakse, te utvrđuje slučajeve koji se ne smatraju reklamiranjem zdravstvenih usluga,
- obavlja i druge poslove određene Zakonom i Statutom.

### Član 5.

Prava članova Komore su:

- pasivno i aktivno pravo glasanja i s tim pravo sudjelovanja u svim organima Komore;
- prava na usluge Komore, koja proizilaze iz člana 4. Statuta;
- sudjelovanje na seminarima i drugim stručnim savjetovanjima, koje organizira Komora;
- pravo na pravnu pomoć i organiziranu mogućnost osiguranja protiv odštetnih zahtjeva;
- pravo na pomoć člana i njegove porodice iz osnovanog fonda za pomoć;
- pravo na pomoć kod traženja zaposlenja i obavijesti o potrebama za ljekarima;
- pravo na pomoć kod traženja odgovarajuće zamjene za vrijeme odsutnosti;
- pravo na stalno stručno savjetovanje i besplatno primanje glasila Komore.

### Član 6.

Dužnosti članova Komore su:

- poštivanje svih odluka i akata, koje Komora usvoji na svojoj Skupštini;
- uredno obavješćavanje Komore o svim podacima, koje propisuje pravilnik Komore o vođenju registra ljekara;
- uredno plaćanje članarine, koje određuje Pravilnik o finansijskom poslovanju Komore.

#### Član 7.

- Organi Komore su:
- Skupština Komore,
  - Skupštinsko vijeće,
  - Predsjednik Komore,
  - Izvršni odbor kojim predsjedava Predsjednik Komore,
  - Sud,
  - Tužitelj,
  - Nadzorni odbor,
  - Komisija za izbore i imenovanja.

Mandat članova Skupštine traje četiri godine sa mogućnosti ponovnog izbora.

Članovi obavljaju svoje zadatke po isteku mandata, dok se ne obave izbori novih članova, a najduže 6 (šest) mjeseci.

#### Član 8.

Članovi Komore su podijeljeni u Izborne jedinice prema Pravilniku o izbornim jedinicama. U izbornu jedinicu su udruženi ljekari za svaku pojedinu zdravstvenu ustanovu, ili organizacionu jedinicu unutar nje, privatnu praksu, te druge organe, organizacije i institucije iz oblasti zdravstva, odnosno pojedine interesne grupacije koje su specifičnog karaktera. Izborna jedinica mora uključivati barem toliko ljekara, da imaju pravo barem jednog poslaničkog mjesta u skupštini Komore.

Svake četiri godine članovi Komore, na općim i tajnim izborima, u skladu sa Poslovnikom o radu skupštine, biraju poslanike za Skupštinu iz izbornih jedinica. Izabrani su oni kandidati koji su u izbornoj jedinici dobili najviše glasova. Mandat poslanika traje četiri godine s mogućnosti ponovnog izbora.

Poslanik u Skupštini Komore zastupa stajalište ljekara svoje izborne jedinice. Ako poslanik ne obavlja svoju funkciju, ili je obavlja u suprotnosti sa stajalištima ljekara svoje izborne jedinice, ili je neopravdano izostao sa redovne sjednice Skupštine, može se na pismeni prijedlog ljekara njegove izborne jedinice, ili Komisije za izbore i imenovanja pokrenuti postupak za njegovo smjenjivanje. Smijeni ga se izborom novog poslanika.

#### Član 9.

Skupština je najviši organ Komore. Njeni zadaci su:

- usvaja Statut Komore, Kodeks medicinske deontologije i druge akte po kojima radi Komora;
- usvaja Finansijski plan Komore i potvrđuje završni račun;
- bira i razrješava Predsjednika i Podpredsjednika Skupštine prema Pravilniku o izboru u rukodovna tijela;
- bira i razrješava članove Skupštinskog vijeća;
- bira i razrješava Predsjednika Komore;
- bira i razrješava Tužioca Komore;
- bira i razrješava Predsjednika i članove Suda Komore;
- usvaja periodične izvještaje svih organa Komore i ocjenjuje njihov rad;
- donosi odluke i takođe raspravlja o drugim važnim pitanjima Komore, ljekarske struke i zdravstva u TK.

#### Član 10.

Skupština zasjeda u pravilu jednom godišnje, odnosno kada je to potrebno. Saziva je Predsjednik skupštine na vlastitu inicijativu ili na zahtjev:

- Podpredsjednika skupštine,
- Predsjednika Komore,
- Skupštinskog vijeća,
- dvadeset poslanika Skupštine.

Predsjednik skupštine mora sazvati Skupštinu najkasnije trideset dana po prijemu zahtjeva. Ako to ne napravi, Skupštinu mogu sazvati inicijatori sami.

Sjednica Skupštine, odnosno glasanje, može se u skladu sa Poslovnikom i Statutom odvijati i pismeno.

Zadaci Predsjednika skupštine su:

- saziva i vodi Skupštinu;
- potpisuje ugovore i druge akte, koje usvoji Skupština.

Zadaci Podpredsjednika skupštine su:

- saziva i vodi Skupštinu u odsutnosti Predsjednika skupštine i po njegovom ovlaštenju;
- obavlja sve one funkcije za koje ga ovlasti Predsjednik Skupštine ili Predsjednik Komore.

#### Član 11.

Skupštinsko vijeće je najviši savjetodavni organ Skupštine, a čine ga po jedan predstavnik svake izborne jedinice, s izuzetkom JZU Univerzitetsko klinički centar Tuzla (4 predstavnika) i JZU Dom zdravlja sa poliklinikom „Dr Mustafa Šehović” u Tuzli (2 predstavnika).

Predsjednik i Podpredsjednik Skupštine po funkciji ulaze u sastav Vijeća, a ujedno su predstavnici svoje izborne jedinice.

Izabrani poslanici svake Izborne jedinice iz svojih redova predlažu svoje predstavnike u sastav Vijeća. Ukoliko Izborna jedinica ima samo jednog Poslanika u Skupštini, taj je ujedno i član Vijeća.

#### Član 12.

Vijeće ima sljedeće nadležnosti:

1. donosi Poslovnik o radu Vijeća;
2. odlučuje o promjeni sjedišta Komore;
3. razmatra i usvaja prijedloge opštih akata, izvještaja i planova za čije usvajanje je nadležna Skupština, između dvije skupštinske sjednice;
4. na prijedlog Izvršnog odbora ili Predsjednika Komore:
  - donosi pravilnike i druga opšta akta potrebna za rad Komore koja nisu u nadležnosti Izvršnog odbora;
  - utvrđuje Izborne jedinice, njihov broj, te broj pripadajućih poslaničkih mjesta;
  - bira i razrješava predsjednike Komisija koje ulaze u sastav Izvršnog odbora;
  - bira zamjenika Predsjednika Komore;
5. donosi Odluku o raspisivanju izbora za Skupštinu i rukovodna tijela Komore;
6. donosi odluke, u drugom stupnju, o žalbama na odluke Izvršnog odbora;
7. usvaja završni račun;

8. daje i prima prijedloge koji su od opšteg značaja za uspješno obavljanje rada Komore;
9. ocjenjuje i daje mišljenje o izvještajima Izvršnog odbora;
10. predlaže Skupštini osnivanje komisija, a po potrebi i sama osniva komisije;
11. zahtijeva od Izvršnog odbora raspravu o određenoj problematici;
12. obavlja i druge poslove koje mu Skupština da u nadležnost.

#### Član 13.

Poslovník o radu Skupštine i Izvršnog odbora opširnije uređuje:

- izbor predsjednika Komore i izbor poslanika za skupštinu Komore;
- izbore za organe Skupštine i Izvršnog odbora;
- pozivanje i vođenje skupštinskih sjednica, skupštinskih organa, izvršnog odbora i organa izvršnog odbora;
- tok rasprava i glasanja u Skupštini i Izvršnom odboru;
- postupak zapošljavanja u Komori.

#### Član 14.

Predsjednika Komore biraju članovi Skupštine Komore na konstituirajućoj sjednici. Kandidirati se može svaki član Komore, ako mu kandidaturu odobri izvršni odbor Komore i ako ima podršku 30 članova Komore.

Izabran je kandidat koji je dobio većinu važećih glasova na sjednici Skupštine.

Mandat Predsjednika traje četiri godine sa još jednom mogućnosti ponovnog izbora.

#### Član 15.

Zadaci Predsjednika Komore su:

- saziva i vodi Izvršni odbor;
- izvršava odluke Skupštine;
- zastupa Komoru i potpisuje akte koje usvaja Izvršni odbor;
- potpisuje ugovore, koje ugovara Komora;
- privremeno, do slijedećeg zasjedanja Skupštinskog vijeća, može, u saglasnosti sa većinom članova Izvršnog odbora, razriješiti člana Izvršnog odbora i imenovati drugog;

Za svoj rad odgovara Skupštini Komore, koja ocjenjuje njegov rad.

Funkcija Predsjednika Komore nije spojiva sa funkcijama u organima političkih stranaka. Predsjednik Komore mora to potvrditi pismenom izjavom.

#### Član 16.

Izvršni odbor Komore obavlja, u skladu sa Zakonom, Statutom Komore, pravilnicima i poslovníkom sljedeće zadatke :

- na prijedlog Predsjednika Komore imenuje Generalnog sekretara;
- pripravlja gradivo, analize i prijedloge za Skupštinu;
- provodi odluke i uputstva Skupštine;
- prati i usklađuje rad komisija Komore i Vijeća, kao i druga važna pitanja Komore i zdravstva u TK;

- odlučuje o pritužbama protiv odluka Predsjednika Komore i Komisija Izvršnog odbora, izdanih u upravnom postupku;

- obavlja druge zadatke, određene Statutom i drugim aktima Komore.

Na sjednicu Izvršnog odbora pozvani su i Predsjednik i Potpredsjednik Skupštine, koji imaju pravo raspravljati, a nemaju pravo glasati.

#### Član 17.

Članovi Izvršnog odbora su:

- Predsjednik Komore, koji vodi rad Izvršnog odbora;
- Predsjednik Komisije za medicinsku deontologiju;
- Predsjednik Komisije za stručno usavršavanje;
- Predsjednik Komisije za materijalno-financijska i administrativna pitanja;
- Predsjednik Komisije za privatnu praksu;
- Predsjednik Komisije za licenciranje;
- Predsjednik Komisije za vanbolničku djelatnost;
- Predsjednik Komisije za bolničku djelatnost;
- Predsjednik Komisije za socijalno-ekonomska pitanja članova Komore;
- Predsjednik Komisije za stomatologiju;

#### Član 18.

Sjednicu Izvršnog odbora saziva Predsjednik Komore na vlastitu inicijativu ili na zahtjev tri člana izvršnog odbora. Sjednica može donositi odluke (ima "kvorum"), ako je prisutna većina članova odbora. Izvršni odbor usvaja odluke sa većinom glasova svih njegovih članova. Za svoj rad odgovara Skupštini Komore.

#### Član 19.

Tužilac Komore je samostalni organ Komore i ima pravo i dužnost, u skladu sa posebnim pravilnikom, samostalno zahtijevati pokretanje postupka za ustanovljavanje kršenja :

- Kodeksa medicinske deontologije;
- Statuta Komore;
- drugih nepravilnosti prilikom obavljanja ljekarske struke.

Tužilac ima zamjenika.

Mandat tužioca traje 4 godine, sa mogućnošću ponovnog izbora.

#### Član 20.

Sud Komore je samostalni organ, koji na zahtjev:

- Tužioca Komore;
  - Predsjednika Skupštine;
  - Predsjednika Komore;
  - na prijedlog pojedinog člana Komore;
  - na zahtjev Ministarstva zdravstva;
- a u skladu sa posebnim pravilnikom, odlučuje o odgovornosti ljekara za kršenja, navedena u prethodnom članu.

Mandat članova Suda traje 4 godine s mogućnosti ponovnog izbora.

#### Član 21.

Skupština bira Komisiju za izbore i imenovanja iz reda članova Komore na osnovu prijedloga i prijave, s

tim, da pet (5) izabranih članova, koji su osvojili najveći broj glasova, čine sastav Komisije. Kandidat za člana Komisije za izbore i imenovanja koji je osvojio najveći broj glasova je predsjednik Komisije, sljedeći kandidat je podpredsjednik Komisije, a ostala tri su članovi Komisije. Mandat komisije traje 4 godine s mogućnosti ponovnog izbora, odnosno, dok nova Skupština ne izabere novu Komisiju.

U skladu sa posebnim pravilnikom Komisija za izbore i imenovanja:

- prati, nadzire i ocjenjuje opće izbore i razrješenja po izbornim jedinicama i regijama te izbore i razrješenja u Skupštini Komore;
- daje zaključne izvještaje i objavljuje rezultate izbora;
- ocjenjuje pritužbe na kandidature, izborne postupke i izborne rezultate i prosuđuje valjanost pojedinih izbora.

Komisija je neposredno odgovorna Skupštini Komore.

#### Član 22.

Skupština bira Nadzorni odbor iz reda članova Komore na osnovu prijedloga i prijava, s tim, da pet (5) izabranih članova, koji su osvojili najveći broj glasova, čine sastav odbora. Kandidat za člana Nadzornog odbora, koji je osvojio najveći broj glasova, je predsjednik odbora, sljedeći kandidat je podpredsjednik odbora, a ostala tri su članovi odbora. Mandat odbora traje 4 godine s mogućnosti ponovnog izbora.

U skladu s posebnim pravilnikom Nadzorni odbor:

- nadzire materijalno i financijsko poslovanje Komore
- Skupštini posreduje svoje ocjene godišnjeg zaključnog obračuna;

- po svojoj presudbi ili na zahtjev Skupštine ili Predsjednika Skupštine bilo kada u neodređenom razdoblju provjerava financijsko poslovanje Komore.

Nadzorni odbor je neposredno odgovoran samo Skupštini.

#### Član 23.

Izvori financiranja Komore su:

1. Upisnina;
2. Članarina;
3. Naknada za usluge Komore;
4. Donacije;
5. Ostali izvori.

#### Profesionalni rad u Komori

#### Član 24.

Predsjednik Komore sa Izvršnim odborom izrađuje nacrt za nabavku i uzdržavanje kancelarijskih prostora i opreme i plan redovno zaposlenih stručnih, administrativnih i drugih radnika, koji su potrebni za rad Komore.

Plan iz prethodnog stava treba da bude sastavni dio finansijskog plana.

#### Član 25.

Za normalno obavljanje rada Komore Predsjednik Komore može, uz saglasnost Izvršnog odbora i u skladu sa usvojenim planom iz prethodnog člana,

stalno ili privremeno angažovati ili zaposliti pojedine stručne, administrativne i druge radnike.

#### Član 26.

Predsjedništvo i potpredsjedništvo Skupštine, poslaničke funkcije, članstvo u komisijama i Vijeću, Sudu, Tužilaštvu i Nadzornom odboru Komore, u pravilu su časne funkcije.

Predsjednik Komore odobrava materijalne i putne troškove nosiocima časnih funkcija.

#### Član 27.

Predsjednik Komore, predsjednici komisija i predsjednik Savjeta za obrazovanje Ljekara mogu biti stalno ili djelomično zaposleni u Komori. Generalni sekretar je stalno zaposlen u Komori i u skladu sa ovlaštenjima predsjednika Komore vodi rad kancelarije Komore.

#### Akti Komore

#### Član 28.

Akti Komore su:

- Statut Ljekarske komore TK;
- Kodeks medicinske etike i deontologije;
- Pravilnik o izdavanju, produženju i oduzimanju licence;
- Pravilnik o vođenju registra ljekara i stomatologa;
- Pravilnik o privatnoj ljekarskoj praksi;
- Pravilnik o stručnom nadzoru;
- Pravilnik o radu komisija Komore;
- Pravilnik o radu Nadzornog odbora;
- Pravilnik o izboru tijela Komore;
- Poslovnik o radu Skupštine i Izvršnog odbora;
- Poslovnik o radu Skupštinskog vijeća;
- Pravilnik o financijskom poslovanju Komore;
- Pravilnik o izbornim jedinicama;
- Pravilnik o radu Komisije za izbore i imenovanja.

#### Član 29.

Statut Komore je temeljni akt i s njim moraju biti usklađeni svi drugi akti Komore. Akte Komore iz člana 28. usvaja Skupština Komore na redovnoj sjednici.

Statut Komore i Kodeks medicinske deontologije usvaja Skupština Komore sa apsolutnom većinom svih poslanika. Drugi akti se usvajaju u skladu sa Poslovníkom o radu Skupštine i Izvršnog odbora.

Prijedlog za promjenu Statuta ili drugog akta Komore može dati svaki član Komore. Skupština je dužna o prijedlogu promjene raspravljati, ako prijedlog podrži Izvršni odbor Komore ili Vijeće.

#### Član 30.

Ovaj Statut stupa na snagu danom usvajanja na Skupštini Ljekarske komore TK.

Predsjednik Skupštine  
Prof. dr. Nedima Kapidžić-Bašić

Tuzla, 31.05.2011.g.  
Broj 371/11.